



詩餘自序

沉香亭畔臨紅藥而揮毫沽酒樓前待翠華而釋
褐三章兩字色動楓宸遇之榮矣舞衫歌扇証玄
悟於西河繡轂雕鞍傾妍思於東玉花逢解語人
悅傾城情何麗也若夫濁世荒唐衰年荏苒坐牀
索酒未聞天子能呼畫紙圍碁唯與孺人相對曲
雖名雪和是巴辭歌總成珠聽非吳客而猶欲遣
茲銀管追彼金荃不已過乎然而曾有迴腸每如
轂轉手無駢拇豈令椎懸溯碧浪於扁舟不乏推
篷之會炊黃梁於逆旅偏多跨衛之緣易水蕭蕭

別高荆而不返繁臺杳杳詢李杜而奚從狂來或
 看劍長吟悲至亦擊尊永歎至迺倦息五湖閱尋
 三徑玲瓏皎月夢魂常繞梨花淡蕩薰風時序偶
 題梅子種成紅豆乍引遙思倚到綠楊還憐瘦影
 以是寫心之暇兼抒賦物之情僕本恨人頻遊宦
 海萬里仍攜螭帙一官尚繫匏星居通丁卯之橋
 原依梅市鄰結癸辛之里竊慕草窓撥柳鏤花聊
 復存茲小令搓酥滴粉誰為傳以遲聲譬猶石室
 毀雲已忘舒卷香叢課蜜自識辛甜旗亭莫可挪
 榆篋衍不堪貽贈室無解詩之白媪何由見此平

生世有顧曲之周郎當以俟諸異日吳江玉樵甫
 鈕秀題於補榕書屋



臨野堂詩餘

總目

滿庭芳

二闕

踏莎行

二闕

御街行

沁園春

二闕

一萼紅

夢橫塘

青玉案

四闕

天香

水龍吟

摸漁子

二闕

齊天樂

桂枝香

慶清朝

瓊花慢

渡江雲

畫中天

畫錦堂 三闋

東風第一枝 二闋

喜遷鶯 二闋

瑣窓寒

大酺

驀山溪

瑤花

漁家傲 二闋

霜花腴

柳梢青 二闋

於中好

玉樓春

疎影 二闋

百字令 二闋

滿江紅

瀟瀟雨

步蟾宮

解佩令

綺羅香 二闋

月華清

清平樂 二闋

五綵結同心

風入松

大有

如此江山 二闋

尾犯

好事近

南歌子

秋霽

鵲橋仙

千秋歲

惜秋華

拜月星慢

臨江仙

聲聲慢 二闋

燕山亭

永遇樂 二闋

菩薩蠻

翠樓吟

瑞鷓鴣

青門引

風流子

蝶戀花

壺中天

賀新涼

Blank page with faint bleed-through text from the reverse side.

臨野堂詩餘卷上

吳江鈕 秀玉樵著

常熟黃 儀子鴻閱

滿庭芳 楊花

香惹啼鶯。夢牽舞燕。芳林點點楊花。亭臺覆綠。漫
飛破年華。試看因風吹去。輕狂也。徧遶天涯。妝樓
晚。繡簾初捲。剛落那人家。最是。多情處。西園人
散。頻拂衣紗。况絮縈酒屋。雪染漁艖。遙想謝娘。庭
院。墨池上。雨長萍芽。空回首。章臺舊樹。愁殺暮栖
鴉。

踏莎行

燕

剪剪東風蕭蕭社雨。一生何事長羈旅。畫梁繡幕屬他人。寄人廡下終當去。柳絮池塘梨花院宇。春光半為營巢誤。舊時王謝已無家。重來不見營巢處。

又

百花庵送春

芳草萋萋盈堤遍野。天涯不繫王孫馬。柳垂無奈別離何。花飛還似飄零者。鳩婦成家燕兒知社。萍踪堪寄惟蘭若。三分春送酒杯中。十年恨集寒燈下。

御街行

鴛湖元夜

樓臺如夢夜如年。涼露瀉銀蟾。春宵未許千金換。况有涼月初圓。幾通畫鼓。數聲響爆。攪破五更寒。酒亭花市語聲喧。風裊絳紗烟。笙歌簇處星球滿。都在曲院勾欄。綠窓半掩。紅妝爭倚。多少玉人看。

沁園春

題圭庵贈黃牧九

麻水東偏。荻塘南去。巋然此廬。見土銳下方。六窓軒殿。中溫外潔。四壁蕭虛。貝葉晨參。牙籤夜校。歲月消磨數卷書。任荒草生。閉庭欲徧。未暇刪除。

斯人玉德純如。又況學南宮。三復歎。每卧起。頽山。
枕藏秘寶。坐臨皎樹。席吐明珠。紅藥欄邊。綠蘿徑。
裏來往時盈。長者車。美多半。是花侯。酒伯。雲。珮。烟。
裾。

一萼紅

燈花

伴寒閨。正清輝的燦。丹蘂發盈枝。鳳翅分烟。蘭心。
吐穗。徐看刻玉痕。移拚孤坐。三更漏斷。有人在紅。
閣。夜敲碁。隔雨簾疎。護風屏小。金粟垂垂。惹起。
舊愁無限。想羅襦背解。喜報芳鞋。癡卜佳期。誤占。
遠信。辜負多少相思。憐碎影依稀似語。那堪向珠。

淚欲銷時。好把香煤。剪取待畫雙眉。

夢橫塘

蝶塚

雲塘粘粉。月檻棲香。花間曾記幽遇。金縷飄零。誰。
喚起。春來嬌舞。相逐釵頭乍。迷裙底。風流何處。嘆。
紅牙按譜。遺拍猶存。蘼蕪冷。惟杯土。素紈閑撲。
牆陰早織。魂一片。驚斷遊女。化玉初成。空剩得舊。
叢如許。好收瘞。滕王畫卷。謝子詩囊。並千古。栩栩。
燈前。翩然入夢。有西園芳路。

青玉案

贈趙孝廉雯玉

燕中詩學誰堪擬。

河南趙子

更風骨亭亭峙。
彥昭琴院

家傳袍服紫。

清獻

懸麟登閣。

翁孫

怒蛟騰水。

嘉州刺史

此日雄飛矣。

子柔

獨擎桂斧蟾宮裏。

門下侍郎

望塵後。

餘諸子。

文楚

文膽包身無戰壘。

子龍

得師韓愈。

天先得交羊陟。

元叔

玉尺聲名起。

延吉

天香

龍涎香

杵月千年槎雲萬里。驪宮唾成珠老。瑞腦同分神
爇已化。製就博山爐巧。春來甚處看玉手。鏤花織
瓜。長日鎖窓暗逗。微風畫簾清裊。何事浣薇刻
棗。酒醒時夜聞偏好。重撥寒灰。銀葉漸生紅小。沾
袖餘馨在否。但如絮柔情向空繞。暝坐氤氳寒侵

獨早

水龍吟

白蓮

蟾宮素女三千。誰教舞向瑤池裏。卷綃霧薄弄珠
烟細。原名花蘂。蓼襯微紅。葭圍斷碧。亭亭出水。想
西陵畫舸。輕移雙槳。難覓却鷗眠處。聞道生來
玉井乍相逢。銀塘十里。最憐傾蓋。不須污粉清寒
如許。廬嶽禪心。樊川賦筆。幾回延佇。怪月明但有
香來。終夜闌干重倚。

摸魚子

蕙

過桃花。水痕初漲。吳天遙寫晴鏡。生如釵股浮青

出。鳧。葉。羃。波。常。淨。烟。路。迴。更。苻。帶。荷。錢。接。壘。還。相。映。香。寒。色。瑩。喜。犀。筋。凝。脂。磁。甌。泛。玉。鹽。豉。點。偏。勝。紅。塵。事。莫。教。秋。來。未。醒。當。時。鱸。美。誰。並。歸。心。一。夕。愁。波。起。貯。得。幾。絲。清。冷。應。猛。省。是。到。處。西。風。堪。動。扁。舟。興。鷗。飛。鷺。瞑。想。千。里。茫。茫。高。人。獨。去。翠。剪。半。江。影。

齊天樂

蟬

微。薰。天。氣。濃。於。酒。萬。綠。陰。陰。催。晚。槐。日。閑。庭。柳。眷。深。巷。幾。樹。夕。陽。聲。滿。炎。情。不。染。正。潔。飲。常。清。高。吟。日。遠。羸。得。佳。人。薄。勻。雙。鬢。鏡。中。燃。秋。殘。猶。集。古。

寺。乍。聞。涼。雨。後。不。勝。淒。斷。弔。月。蛩。悲。啼。烟。螢。急。曾。是。小。窓。幽。伴。孤。眠。客。倦。記。珥。重。朝。冠。綃。輕。宮。扇。舊。夢。難。尋。暮。雲。迷。翠。館。

桂枝香

蟹

蘆。花。颭。雪。正。遠。岸。夕。陽。秋。老。時。節。初。見。遠。汀。出。水。暗。莎。衝。穴。西。風。吹。醒。興。亡。恨。稻。雲。黃。年。年。吳。越。沫。拋。珠。碎。臍。圍。璧。小。橫。行。相。接。記。舊。賦。老。饕。曾。說。喜。小。字。金。錢。沈。醉。香。骨。况。有。橙。心。黃。破。菱。腰。青。折。而。今。空。憶。江。南。好。問。何。時。重。整。歸。檝。織。簾。霜。後。篝。燈。星。下。一。尊。魚。筏。

滿庭芳

河豚

荻努平川。桃烘修岸。晴江小隊來時。午橋微觸。遶
 柱故行遲。吞盡流紅。舊恨翻珠浪。一腹蟠。其清明
 到。幾番風信。魚市報初肥。塵吹花院淨。銀鐺細
 煮。火候應知。看蟻尊滿泛。犀筋爭持。拚得浮生輕
 擲。何須問。攬膾蒿菹。難忘也。脂凝酥潤。聞說網西
 施。

慶清朝

贈陳內翰其年

瘦擁詩肩。狂添酒胆。絕倫誰得如髯。畫溪歲月。寄
 情多在香奩。宛轉麗詞。爭唱錦靴。暗點雪兒尖。何

須如庾郎哀艷。僅賦江南。一鶴飛書入隴。看幾
 年珠淚。消盡青衫。雲烟落紙。驚聞遙啟。宮簾應有
 賜袍。初繡夢中花管。色相兼休。吟道舊山。悔別微
 祿羞沾。

瓊花慢

贈朱內翰竹垞

花撥垂鞭。崩緜攜劍。是舊時遊跡。齊宮燕市。記淋
 漓醉墨。尚畱紅壁。逢迎若箇。笑袞袞。少年裘屐。但
 賦成。換取黃金。付酒旗歌席。偶然天子呼來。便
 芍藥欄前。起弄吟筆。玉堂月俸。堪貫酒。鈔給烏翎
 三百。宦塵如海。曾不點山人衣白。好夢在一枕松

風仍繞故園。泉石。

渡江雲

贈姜徵君西漢

文章驚海內。蕭蕭兩鬢。猶自壓儒冠。寄身孤劍外。
鏐冷芙蓉。何處向人彈。愁詩病酒。消幾度。片月長
安。偏占却。狂名如許。曾得達金鑿。相看。虞翻骨
柁。枝乘年華。應此飄零也。且莫歎。白沈楚璧。紅刈
秦蘭鑑。湖一曲。無多地。甚官家。賜與猶慳。歸去好
怕他。鷗鷺盟寒。

畫中天

巴雲扶五十初度

梅痕刻玉。見一枝庾嶺。春傳消息。二十四橋明月。

夜鶴背。馱來仙客。盞橋分紅杯霞流紫。清奏盈瑤
席。管聲吹暖。微陽初轉。鄒律。聞伯玉行年。衛稱
君子。恰逢斯日。家在菊潭人百歲。何似今纔半百。
宛轉歌珠。蹁躑舞鳳。彩鬪江雲色。最憐瓊樹。早移
向庭前。森立。

沁園春

送鄭文谿還里

氣已悲秋。心更傷離。如君此還。嘆長卿賦賤。彩毫
欲擲。子昂琴碎。畫軫誰彈。碁奕京華。梁炊羈旅。何
似山間與水間。歸途好。知醉扶漿店。吟據詩鞍。
况從蓮幕盤桓。儘贏得風光盈路看。正落鴻依浦。

臨里堂集 卷一
盧粘雲白鳴蟲連岸楓染霜丹萬里遊思八年鄉
夢直到衡門纔自寬征衫解想剪燈芳夜細語長
安。

畫錦堂

慕公子寓齋

碧甃飛鴛銅觚駐爵重門靜掩清晝浪影搖花是
處風簾垂繡紗幙綠將筠黛借雕闌紅與榴衣鬪
秋生後蟬雨送涼疎林夕陽微逗書圍鬆几上
有蓉粉藏箋薇香凝籀沈醉文仙不在舞羣歌袖
占角戲爭燈下奕射闈密發尊前覆新詞就笑看
濡毫寶硯小童擎候。

又

秋水沉鈎春花禿管生平孰是知己虛左相迎獨
有關西公子拓落不嫌窮似阮披猖偏愛狂如李
紅塵裏走馬舊臺重來醉歌燕市誰比纔弱冠
便柳染衣青荷垂囊紫儒雅風流骨相總非純綺
百斛龍文衝斗見一株玉樹臨風倚朱門啟羨爾
攜香滿袖退朝花底

東風第一枝

觀韓中翰孟一庭前海棠

風剪裁脂露珠綴碧重簾艷影初逗乍聞閨苑飛
僊喚作畫堂名友翩然舞醉好似酌紫霞天酒問

輕盈若箇能扶付。與一雙紅袖。冷曲逕。溶梨月。瘦迷古渡。暈桃烟繡。笑他龕俗漫山。得入黃州夢。否。蒼鬢素靨。筭只有芳梅堪偶。待明年春滿。朱門報我禁烟時候。

又

韓中翰招賞海棠夜分席罷仍用去年前調

桃雨飛初。柳烟散後。芳辰隔歲重省。仙枝記約同看。依稀畫欄曾凭。雙來靈鵲。又銜到清明花信。壓簷牙春色。偏濃染就粉痕脂影。籠銀燭。西園掩映。點彩筆。東君管領。一尊綺閣初開。四筵玉山相並。深宵茗芋。便此際笙歌須靜。怕紅妝睡足多時。

莫把梁州吹醒

喜遷鶯

東別駕珂里宦歸維揚丹青自怡賦此為壽

綠陰朱閣。正徑蘚鋪錢。門槐成幄。茶碾書籤。經營隨意駐歲。不須丹藥。早晚巾車何處。半在鶯郊花郭。放醉眼看。郢兒爭笑。接離斜着。功名追憶後。一夢十年。早向揚州覺。瓊樹春雲。玉簫夜月。贏得攜歸雙鶴。選勝領閒。便點筆把風詩補作。更贈客有鶯溪冰絹。寫來林壑。

瑣窓寒

夏日喜雨

絮壓陰濃。珠翻點細。乍消煩暑。斜風小燕。溼了歸

來芹觜。怕瑤琴潤着絃絲。旋燒銀字。添沈水。聽碧
梧簷外。紅蕉欄畔。靜敲牕紙。爲問山城裏。有幾
行柳色。碧沈烟市。紛紛簑笠。畫出橋頭漁子。待來
朝看取。平原一犁耕破。芳塍綺更扶。疎菜甲初肥。
摘到園丁喜。

大酺 本意

自咒桃前吟椒後。燈事闌珊。華屋釵頭。搖綵勝。正
青陽堪踏。鬧蛾相觸。草亂衫痕。花迷屐點。處處鳴
金吹竹。溪邊軟莎地。愛晴風似酒釀。春初熟。有紅
照妝新。碧浮香遠。湔裙人獨。江東爭袷服。記毘

陵震澤。驚游日看幾度。隄眠嬌柳。簷笑癯梅。忽流
光轉。同車轂彩散。飛樓速。唯此際。夜珠盈牘。畱千
古。昆池曲中和將近。好製青囊盛。穀豐年共聽。瓦
卜。

驀山溪

風雪夜行

冷光無際。晚失行人路。茅屋隱平田。望遙村。但畱
疎樹。饑鳥似墨。幾點散驚風。荒渚外。小橋橫。孤廟
僧高戶。吟髭生凍。燃短難成句。馬首獨衝寒。正
深入亂雲低處。枯聲颭。荻彷彿。是河干。依斷岸。有
漁舟。紅閃篷燈露。

瑤花

河冰

長河載雪。一夕西風。把紋波吹結。酒簾漁網。家家岸零亂。橫釵垂玦。棲鴻難定。但幾處汀蘆黃折。想神妃步襪無塵。閑住水晶宮闕。小窓靜鎖梅魂。看瓶凍琉璃。誰金芳潔。故園何在。奈此際正阻夜溪歸。懺清寒相照。筭只有天涯孤月。問當時一片心期。人在洛陽能說。

漁家傲

題大梁旅舍

一點秋來鴻背羽。柳外輕雷碾出絲絲雨。草色到城朱閣吐。天欲暮。行人衣染行塵古。屈指遊梁

今已五。醜酒鑪頭。酒伴誰高杜。如笠小軒容獨步。青滿戶。數竿修竹。牆隅補。

又

準提閣看荷

秋色幾回高閣裏。依舊池塘換種花人矣。拂拂清風來檻底。香不已。綠雲深處紅鴛語。疎柳成行依斷渚。一鏡分明寫出秋如此。為政心閑誰共許。知也未。尊前饒有花君子。

霜花腴

九日舟中用吳夢窗泛石湖韻

危檣獨倚。正柳風蕭蕭。欲墮人冠。雲擁魚莊。水吞鳧岸。黃花放也應難。旅懷自寬。豈良辰常到尊前。

渺平沙。甚處登高。夕陽千頃。散秋寒。何事重尋
荒渡。但幾聲斷雁。換却林蟬。綵展霞明。鱗搖波濶。
爭來借作吟牋。共誰暮船。載半環蟾影。娟娟。料明
年未定。遊踪把芳莢細看。

柳梢青

中秋飲何二尹齋

何處刪愁。歸兮屢賦。尚阻扁舟。去歲觴蒲。今年簪
桂。都在陳州。故人未負中秋。出斗酒。非因婦謀。
問月。天涯關山一點。幾見當頭。

又

宛丘登蘇氏園樓眺望

紅墜蓮秋。孤城一片。晴抱芳洲。蘇老文章。鄭家賓

客往事雲浮。小山新結飛樓。沙渚外。堪橫遠眸。
泛不嫌風。眠能戀月。只有閒鷗。

於中好

題庭前石筍

瘦生雲骨。秋牆內。碧繡出苔錢。紋碎怪他孤影。誰
當配。看月冷。修筠背。久參玉版禪。三昧空分得。
峯頭餘黛。鬱林歸去。應同載。語便此君相對。

玉樓春

束公子新構如圃索贈

半環岸貯秋泉秀。新結筠牆相影瘦。紅雲垂地一
簾花。碧浪擁門雙扇柳。閑看帖石階前後。點染
玉螭常在手。莫嫌城曲少青山。大小米山家內有。

公子與其尊人
別駕公俱善畫

青玉案

呂家潭夜泊

年年作客歸期誤。長買箇扁舟住。秋挂布帆風色暮。林燈近遠。渚星上下。月黑戎戎市。無端最是隄邊樹。旅夢於中暗來去。夢到江鄉驚忽寤。鷄聲伊啞。魚聲撥刺。渾似江鄉路。

疎影

秋柳

青疎隴首。乍淒風幾陣。吹到涼驟。無力勝綿有恨。垂絲困倚。夕陽衰埃。曾經栗里門前路。正相近菊開時候。豈長條似昔依依。尚忍向人分手。猶憶

隋隄繫舸伴。蘆花月影。搖曳江口。怕聽啼鳥。懶試遊。聽但有酒帘依舊。畫樓十二。渾如夢映。是處翠簾紅。曠空歎伊。金縷飄零。剩得舞腰俱瘦。

摸魚子

鷺鷥

草青時。水田漠漠。雨餘罨挂荒浦。潛行不道人先見。羣引碧蹕微步。驚且去。看忽上。遙天猶帶圓沙起。烟開月浴。窺墜粉蓮中。牽絲荇底。多少羨魚處。西風緊。白點蘋花天暮。幾回肩冷秋縷。五更懶做鷓行夢。結得鬪鷗新侶。臨野渡。愛小艇孤橫。拳立如延佇。惠連曾賦。算不是當年。池塘雪色難奪。

羽衣素。

百字令

過周郎遺址

殘山剩水。有周遭古壁。紅顏秋晚。僧老未忘金粉。
 地占作祇林亭館。千騎霓旌。八公丹竈。往事桐曾
 剪。鐘聲花午。似傳宮漏餘點。聞道壤竊黃巾。濁
 河驚走。城不畱三版。雉堞已非當日。舊何況尋常。
 巢燕。寶硯珠沈。姬符錦碎。誰識王孫苑。蕭蕭池柳。
 弄風疎影零亂。

滿江紅

旅庭紅蓼

秋老孤庭。還又把秋光畱綴。苔階下。莖搖鶴膝。細

紅成穗。點點好風扶不定。紛紛纖月看如墜。最憐
 伊霜冷欲飛時。容偏媚。空曉鏡。湘鬟對。空晚渚。
 睂毫續。是誰移種。此落英籬背。蘆葉三更鴻影斷。
 蘋花兩岸蛩音碎。想疎枝斜拂釣船頭。漁翁醉。

瀟瀟雨

落葉

秋晚羣山出。見涼颼捲樹帶愁吹。漸埋黃壓碧。亂
 痕都散。碎影相隨。回首濃陰池閣。惟倚醉霜枝。似
 我飄零客。一樣淒其。誰道宮溝易鎖。把芳心流
 去。上有題詩。想催情綴色。舊景繡牕時。而今冷蛩
 聲外。但孤燈村遠。逗疎籬。蕭蕭夜掃圍茶竈。佇吐

烟絲。

步蟾宮

大梁客夜

疎燈漸隱梧桐閣。早門外聲傳霜鐸。明河一片墮
遙天。挂練影嚴城西角。風絲拂髻紛紛落。透旅
服寒威猶薄。此時秋思到誰家。料已有羅幃人覺。

解佩令

自敘留別項邑諸友

十年書笈九重賦。篋嘆半生踪跡都如寄。同學翩
翩看次第。鳴騶乘駟。獨歸來折腰為吏。且馴階
鶴。且烹厨杞。忽高堂駒光難繫。去矣孤城。又何用
囊錢碑字。有盈襟蓼莪雙淚。

卷上終

臨野堂詩餘卷下

吳江鈕 琇玉樵著

常熟黃 儀子鴻閱

綺羅香

佛手柑

白鶴雙林青雲二頃。幾共橘晨橙暮。彈指霜清。大
小黃垂秋樹。纔石丈欄外。拈花又玉女。牕前擎露。
看園官摘向津梁。湘筠結碧籠相護。長齋人到
繡閣。安設烏皮小几。色如金布。未許持聽鶯語。酒
徒休。誤輕擘處。潤比酥清。久攜時柔翰。莢素最好。
是雙玉傳來。帕羅暗香聚。

月華清

蟋蟀

苔繡泥封。藤鈎石罅。是伊俟秋吟處。靜耳聽來。多在綠階青渡。桐一葉。會寄唐風。燈四壁。初成歐賦。如訴。但牀下相親。清宵難曙。見說閨堂。紅粉小隊。金盆鬪旗。頻樹。弔月當年。尚有莎間纖羽。驚忽到。倚杆深閨。悲不了。卧麟荒墓。盈路任愁人多少。淚霑遙戍。

清平樂

題莫亞夫小像

素交風月。不用黃金結。宦海歸來鷗夢濶。今已詩髯如雪。舊情曾寄蘭亭。侍書人有樵青。偶拂蓉

箋新粉。視池纖手香凝。

百字令

寶應重午

馬湖蕭寺。見疎窓幾點。榴花紅發。絲線不知羈旅恨。繫定浮踪。天末風弄蒲香。露銷葵錦。晝永人愁絕。問愁何許。隔簾雛燕能說。猶記夢日亭邊。羣龍水戲。看舞江鱗。一瞬年光。忽催我又作陽平。孤客符綰。吳釵筒。沈楚黍。鄉景都無別。盈尊碧醕。有情來照華髮。

疎影

初夏閨倦

林花無賴。將紛紛瘦影。飄送簾外。朱了櫻唇黃了。

梅心誰家尚有春在。柔風當午。催人懶縮不起。縷金衣帶。晝慵騰新夢。來尋忘却。綠鬟雲壞。一鏡遙山未鎖。任萱留霽色。奪取眉黛卸。甲冰絃斂。子文楸。凡事都非心耐。幾回獨往。閨庭宇。悵此日碧天如海。聽雕梁學語呢喃。知是燕雛兒大。

綺羅香

螢

墜地仍流。飄苔忽定。生小暗明相半。巧弄輝輝。添繞碧梧欄畔。攜錦字。映出疎囊。趁玉砌。撲來輕扇。更臨波菰蔣成叢。烟村破屋。夜深見。當年應有遺恨。化荒原腐草。古今頻換。畱得餘光。長是雨沈

風散秋。欲老駝陌。悲涼客未歸。鹿場零亂。問幾點珠斛。曾量冷飛舊隋苑。

五絲結同心

鴛鴦

共池頻顧。分鳥爭飛。靜占銀塘新水。春澌明於鏡。閒數到七十成行。都紫萸。最憐是處。雙棲穩。鎮長並藕花香底。俯江檻。誰拋蓮子。忽把夢兒驚起。有時雨翻珠細。却暗藏曲渚。翠偎紅倚。人在重簾下。遙生妒。一點相思。輸與芳名顛倒。將伊寫封兩字。綠窓小兒。更語針娘。繡他交頸。須繡到白頭爲侶。

風入松

題寶應二真祠古松

銀壇鶴夢幾回醒。世已千齡。種得當時龍欲化。爭奈爾仙院長局。迓石香浮。鱗赤粘雲冷。播鬣青似嫌秦爵有遺腥。金地蟠苓。偏袒老僧根。下坐看清宵。子落空庭。風靜聲猶謾謾。月高影自亭亭。

大有

魯謙庵先生牧松十餘載。晉秩淮陽。觀察不數月。掌臬中州。賦二闕奉貽。

繡羽新猷。錦鱗舊裔。駐雲間十年五馬。展芸編。唯有卓公堪亞。春上鶴亭秋桂閣。聽處處吹豳歌雅。烟火十萬家。今風流二千石也。御屏績題曰可。將姓字。銀毫玉蜍親寫。一俊淮揚。未許尊江猶借。碧盡甓湖楊柳。已催到篠簜盈野。費幾回籌月尊。

前巡梅鈴下。

又

嶽色搖青。河聲走白。賦勝地才經枚馬。倚中天。萬堞寒雲相亞。執法星輝連月觀。照耀千秋風雅。梁獄寧尚寬乎。于門從茲大也。吾吳欲畱不可念。舊德總有黃金難寫。內外兩河。爭說神君宜借坐。擁繁臺歌吹。悄無聞。踊謠清野。蚤迎到金策門前。玉環階下。

如此江山

湖口初夏和答查聲山弁以誌別

扁舟入手。記仙侶曾攜。雲帆西渡。鬢翠雙姑。髻青

五老忽到江山佳處身安且住正水古宐經石奇
 堪譜紅豆詞成錦毫碎落珊瑚樹 况是縱橫墨
 妙向曇礪小市籠鶯辛苦捷鬪吟多狂嫌醉少楚
 澤來尋漁父相逢湖滸悵芍藥翻階將離隨賦百
 二松間看愁人獨去 石鐘山畔有
百二松亭

又 金陵懷古

江來萬里看鐘阜龍飛前朝王氣渡認桃根巷迎
 燕子猶似當年佳麗碧香紅膩又脂井妝凝綺樓
 歌沸花繞長干打潮畫槳鴛鴦避 莫問興衰幾
 度問金鞭入夢有人醒未鑄鐵成尋量珠盈斛只

是斜陽難繫驅愁無計且宮錦裁袍放舟天際采
 石磯頭覓青蓮醉地

尾犯 嘗筍

春光團野正小園雨溼燕襟時候銀塘昨夜輕雷
 轉有龍孫驚走彈琴舊地乍穿過苔茵厚滿林間
 綠坼新痕露華半帶泥覆 記得石泉燒後清風
 曾與茗鬪問蔣牙碧碗手薦厨娘玉纖誰瘦拈豆
 看蠶含櫻聽鳥同銷炎晝想深谷未化篔簹渭濱
 嘗遍饒守

好事近 秋夜舟行

十幅峭蒲帆。卸下柳西新月。舞岸螢光。紅小與林
燈明滅。客心淒斷在孤舟。好似初零葉。卧聽無
邊。蟲語把秋聲生咽。

南歌子

重過大梁旅舍

簾水雙鈎揭。屏山六扇圍。舊痕苔逕未全非。尚有
似人黃菊。淡相依。愁攪吟思亂。寒衝醉力微。不
堪雨色傍簷飛。終日沈沈。如夢送秋歸。

秋霽

柿

吟葉催肥。擁一帶斜陽。蔽盡秋屋。蒸棗烟疎。摘棉
雲小。滿林硬黃初足。晚陰卧犢。暗巢未許來禽宿。

待夜珠如火。月明涼。剗載千斛。

須知蟹禁好擘

寒膏笑。聞蘭閨紅漬。纖玉更炎窓。輕霜落杵。雙環
小印成銀麴。滿盃冰泉消暑酷。看貯愁處。依樣繡
作詩囊。蒂聯絲軟。瓢分綃。蹙。

鵲橋仙

七夕

瑤鈎墜影。銀河息浪。鵲報雙星渡了。天家原不勝
人間也。只是離多會少。犢禪收曝。龍梭停織。秋
到蕭齋偏早。此生巧處。盡成愁且。莫願年年賜巧。

千秋歲

贈李蒼山

玉山秋曉。絳葉飛晴昊。籬下菊開猶小。銀垂廊月

皎碧染。殺溪邈。羨此地。曾留八駿來。雙鳥賦得。
青蓮調。走却青牛道。衣錦客。年何少。樓簫吹鳳好。
庭樹生珠早。更喜是。北堂常對忘憂草。

惜秋華

晚眺

平野烟凝。見牧歸兩兩。隴頭人少。雉堞粉痕。遙映
殘霞飄渺。寒鴉幾點。孤村外。爭帶夕陽紅小。又何
處。疎鐘漸起。松關聲杳。遠近山如抱。但無邊。亂
碧影。隨峯倒。乍變一天暝色。素空雲掃。微涼陡入
西樓。纖月向林端來早。秋老愛初蟾。冷垂銀好。

拜月星慢

和答金道州

揣雪梁園。巡梅粵嶠。幾度愁天雲散。一紙書來。尚
錦談珠辯。塵衮衮。堪笑重分鶴俸。猶向杞厨抄飯。
共入長安。不惜雙鳧賤。看逶迤。接翠山容。舊更
何日。把盞鶯聲畔。多少。旗亭舊事。總與春俱遠。記
柔情。祇賸青鏤管。花陰午。小閣薰風淺。待欹枕。寄
夢相尋。忽瘦紅。飄斷。

臨江仙

雨廳

榴纈乍繁。葵錦退。山城雨色。淒迷。飛花舊徑。水成
池。燕歸無語。悶對畫簾垂。漸覺羅衣生。晚潤香
篝費。盡烟絲。碧陰濃。壓粉墻低。驀然敲砌。枝果墜。

風時

聲聲慢

杏花

話晴燕小吟暖蜂繁香叢幾樹紅欵有意憐春墻
 頭半出如窺鞦韆深院記絲繩偏近高枝凝望處
 愛輕衫亂影斜日遲遲 休問曲江舊事但書莊
 藥市映柳參差欲駐仙魂寄情多在芳卮扶得玉
 樓人起又一番風信來時聽鶯好且相尋前村酒
 旗

燕山亭

野人有餉李者用句曲外史咏楊梅調

廉井畱甘仙蹊孕脆董杏張梨堪亞古越荒郊幾

樹斜陽曾入樵人閑話占得佳名每摘向綠陰朱
 夏盈把看冰盃初沈西園清夜 葉心時墜風前
 疑暗落金丸覓流鶯打絲筆素箋醉草疎牕好與
 來禽同寫雲壑相貽又何用勞人重馬問甚處再
 覓伯陽舊舍

永遇樂

祝李內翰子德

八水珠旋三峯玉峙高齋何許松不知年桃能忘
 世柳記先生里舊山猿鶴依然無念回首帝鄉如
 咫念當日蓬瀛高步曾到北門仙李 袍攜獸錦
 帙開螭翠歸向書倉詩壘著五千言通三十乘絲

筆隨時珥。秋來好時月。弧在戶。不用更餐雲子。但笑看庭前玉樹。已森森矣。

菩薩蠻

題香笑亭

溼雲如夢愁難醒。曉來雙燕栖梁冷。最忍是東風。吹殘杏靨紅。玲瓏花影照。亭小名香笑。點地繡成衣。看他春自歸。

翠樓吟

春雪

風信頻催。雲陰忽定。密雪霏霏飄墜。萬家春樹冷。早迷了。灞橋歸騎。高樓誰倚。但曲檻留紅。重帷藏翠。人姝麗。玉鑪香燼。畫簾垂地。好餘鬪草工夫。

將瓊獅爭塑。綵鈴雙繫。晚來攜燭照。怕明日簷前朝霽。輕沾斜綴。任柳誤清眠。杏銷殘。醉門深閉。問伊。問。鶴。今年寒未。

聲聲慢

題如皋馬玉振小像

前身金粟。舊侶瓊簫。偶然夢落揚州。滿抱烟霞。寸心早謝。悶愁時時囊攜。古錦引黃衫。同控花虬。行樂處。有歌聽燕筑。舞看吳鈎。似少游。今朝重見。但徜徉下澤。不羨封侯。一笑相迎。江邊幾箇盟鷗。試將蓉箋拂粉。趁華年。繪出風流。向杏天微醉。箕坐科頭。

瑞鷓鴣

贈女校書宋巫仙

何來小玉早窺牆。殘夢離雲見曉妝。織屐罩霞三寸錦。禿襟搓粉一圍香。慣疑訛字當歌怯。暗解先機對奕忙。見說我為風月主。近前贏得道勝常。

青門引

客夜

槐古鴉棲暝。碧瓦雪融寒定。隔牆風送晚鐘聲。殘書讀罷。隱几曲肱枕。疎星照地。禪扉靜。春倦消杯茗。夜闌行遠。紅燭伴人。還是愁人。影。

清平樂

述懷

人來橋里。北斗城中寄。雲白塵黃分兩地。何事賦

歸猶未。可憐如羽年華。眼看輕擲天涯。粉蝶數聲殘角。春深夢斷梅花。

風流子

贈吳玉濤

風流吳季子。青鏤管。夢取妙年時。向罨畫溪頭。慕他蘭氏。曇礪市上。換得鶯兒。真堪羨。橋林雲浩浩。諺草日遲遲。膝閣賓僚。邀題勝地。謝家絃管。待諧妍詞。正秋高仙掌。相逢處。引起舊日歸思。問我年來。吟興雪點衰髭。歎閭門曳馬。白還疑練。灞橋握柳。青不成絲。唱徹尊前金縷。同在天涯。

蝶戀花

平陽客舍杜子邁村席上遇女校書雅如戲贈

迢迢姑射來仙子。一點銀燈照見櫻唇啟。蟬鬢犀梳慵不理。酒闌斜抱薰籠倚。俊賞杜郎今有幾。紅粉情多。家住鴛鴦水。薄倖名兒贏得未。請君證向茶烟裏。

永遇樂

祝家易庵夫子八十

茵蔯門深。篔簹蹊永。爲小園地。正則庚寅。義熙甲子。絕異人間世。恍然回首。江山故國。幾見隙光奔。驥向疎牕。烏絲翠管。夢華遺事曾記。北林枕月。南田巾雨。未忍一竿辭渭。點檢詩城。平章麴部。薄試閒。經濟瘦筇相引。何朝可杖。只合倚吟。扶醉儘。

從容文楸坐隱。橘中客至。

青玉案

徐內翰虹亭以所輯詞苑叢談見惠賦此志謝

蓬山夢斷蘋州雨。歸去作鷓夷子。拂黛研朱漁笛裏。玉堂嘉話。玉臺新詠。多少銷魂事。金花當日會宣賜。早向華牋染佳句。試問而今流播處。三都傳寫。九江分餉。狼籍雲藍紙。

壺中天

題錢通政再亭書屋

鳳城左畔。是錦山貴冑。初成仙館。點檢封章歸直後。漸覺炎生軒檻。蕉扇羅輕。榴衣纈小。芳影參差。滿蒲萄引蔓。翠深珠帳如染。待得散帙方慵。揮

杯欲醉。又簾鈎日晚。一點涼蟾。懸柳外送。到玉簫聲遠。清簾高眠。平臺長嘯。有客如嵇阮。竹林舊侶。容他禮數。疎簡。

青玉案

繡毬花

粉叢細剪春風葉。天工巧。勻成纈。碧樹紅閨愁欲絕。仰蜂斜抱。流鶯輕蹴。未解芳心結。團圓有意。憑誰說。看枝上。雲重疊。纖手莫教容易折。梨階香擁。絮簾珠綴。同照玲瓏月。

喜遷鶯

贈黃子鴻

青門孤旅。又柳換薰風。梅招芳雨。房相棐軒。鄴侯

鶴徑尚想舊經行處。點染一枝銀管。雜還千行珠履。渺回首。忽十年。蕉夢光陰如許。當代論才子。江夏無雙。是曩時仙侶。註水成經。裁雲顧曲。爛熳錦囊生。計久作風塵眠蝶。乍遇江鄉。盟鷺浩歌也。對青尊素髮。一聲金縷。

畫錦堂

祝高歷庵八十

泉引珠濤。林開錦岫。高門舊設蘭綺。千載風流。重見翩翩書記。細論獄文。官舍燭疾。揮檄草戎軒紙。誰知己。縱酒放歌。交惟狹荆狂李。歸計成小圃。但碁鬪楸枰。琴調絳几。白髮鬢髭。日作萬頭蠅字。

鷓鴣杖方看鑄玉碧。鳳函已到封泥紫。秋風起。羨爾
臨溪理釣。孝廉船裏。歷庵令子為
丙子孝廉

賀新涼

中秋送鄭子源還醉里

小閣青山夜。正中秋雲破。遙天彩蟾光射。芳桂飄
花。紛似粟。燕子商量。辭社問佳景。向誰再借。千里
湖邊。蕙夢斷。染羈愁。素髮絲盈把。綃衣冷。露珠瀉。
鷓鴣詞客來吳下。喜他鄉開尊相對。碧柑紅鮓。
明日扁舟離海國。南浦高帆已挂。還憶我。楓江魚
舍。舊徑菊松無恙否。羨君歸我亦謀歸也。淵明賦。
手重寫。

卷下終

臨野堂尺牘題辭



余嘗讀春秋左氏傳其所載當時卿大夫言行甚
備而辭命之工政治之懋惟鄭子產為獨著今之
縣邑方百里者與泗上小國等其令長多穢蕙弗
克勝任輒慨想其人若干產者出而理之斯民其
有瘳乎吳江鈕明府湛深經術負王佐才屈首斗
大山城為白水宰素以慈惠開歲在辛壬之交關
中大饑鄰邑多盜起蒲城尤熾白晝持弓矢相攻
刼適其令缺府上公名於中丞檄往攝篆公單騎
入蒲城督吏民捕其魁杖殺十數人闔境以安家

歌戶祝銘德之碑巋然北郭門外此火烈之政子
 產用以攻萑苻者而公乃優為之宜遺愛之浹於
 人思之久而弗諼也余家距公署僅百餘里沐其
 波餘獲有寧宇兼荷教澤因得數奉書問典語莊
 言洋洋纒纒小箋短札意永味雋詩曰辭之輯矣
 民之洽矣辭之懌矣民之莫矣又豈獨子產有之
 哉近晤明府於奉先客舍燒燈論文攷緒窮源幾
 忘形跡酒闌以後請明府尺牘存稿別為一編以
 公於世與東里並傳學而入政僑也有辭夫愈知
 君子之道全仁人之利溥也若夫驚魂動魄精義

名言取材于選規法于唐合漢魏六朝而一之其
 詩文全集則海內諸公不乏好學深思如皇甫士
 安固無埃河山野老輟耕而嘆息其後矣癸酉小
 雪前七日邵陽後學康乃心撰



臨野堂尺牘
 卷一
 四十七則
 卷二
 三十七則
 卷三
 四十三則
 卷四
 三十七則

臨野堂尺牘

總目

卷一

四十七則

卷二

三十七則

卷三

四十三則

卷四

三十七則

臨野堂尺牘卷一

吳江鉅 琇玉樵著

邵陽康乃心孟謀訂

與黃圭庵

今之交庶於市求之衣冠中豈有交乎市之爲交也以利利盡而後交絕利至猶思合力而取故其意尚膠固未離衣冠之爲交以名名未至已角力爭之名至則心高自負忘其肝膽之爲吳越矣朱益州之論客且無用非也圭庵以爲何如

與畢西臨

涼暄二易聚散如之花落鳥啼相與爲恨荒庭海棠歲盛于寒食曉烟睡風晚雲語月可人深致萬態千意當發舊醅共結飲巢于下也

與包自根

握別以來庭梧三下葉矣居無百里之隔令人作千里思參商相望能不愴然近聞吾兄頗患肺疾肺于臟屬金金爲五材之要用猶國有內府太盈則傷下太虛則耗上治之爲難當求良藥以蠲此患昔相如僅稱消渴少陵成於衰年尚以爲累况在富齡乎丈夫一生必須筋力強健則百事可攸

幸毋忽也

與朱長孺

榴月造謁後忽已授衣秋風旅雁馳思良深故繩河王公宦韶及廬者數載蕭然旅櫬家無長物而遺愛廉名尚碑人口先生方有事邑乘若以闡幽之筆存之則清白之著汗簡者不朽矣震澤古柏近蹟并書二則以獻

復沈竹西

尋見者數史云主大水不意夏秋之霖幾同懷襄三吳之民無不懸竈而炊憑牀而汲可謂奇稜讀

苦雨作不啻老杜大風破茅屋歎也水沒膝不得
一晤書此以代握手

復顧英白

嘗憶先生歸里時寒冰滿湖晴雪在地琇斯時適
疽發背不及執別倏忽又踰五歲隙駒石火不足
以喻其疾而幻也其間變故不一咄咄怪事皆出
意外大雅淪亡交知零落言之可爲流涕始知先
生屏跡人宇著書自娛紙窓竹屋爲終焉之計先
幾明識實邁等夷臘盡春生寒梅欲發甕頭新釀
初熟幸以扁舟過我快聚數日

與仲岷山

灑翰風開帙揮絃月到琴此比來竹林佳况也昨
承枉駕劇談斐然之喜不獨在弟卽此君當爲生
色矣

又

入春以來恨事有二風信頻催梅魂不定西園芳
景強半消磨夜雨聲中一恨也花晝燈宵抱膝一
室欲與素心人共此清緒而水雲間之一恨也別
來五十日已得二恨生此三萬六千日間可知矣
二月四日爲弟生辰會日月之幾何歲荏苒而逾

壯客中賦七言自壽并錄紙尾奉寄

與笠庵上人

僕在京華所不能一日忘故園者老親而外惟一
二素心人至于綠草閒房白雲禪侶則尤其時寄
曾臆者也旣而頓轡南歸急尋蓮社而吾師竟一
葦東渡矣以吾師嶽嶽歷落岸然物外玄度風月
之交昌黎推敲之咏正樂與同之乃咄咄之夫大
以爲怪遂致飛錫他山大抵浮屠氏之見詆于吾
道者惟和光同塵四字而世人之苛求吾師者乃
在於此宜所如之不偶也閒鶴虛雲寄流無定豈

復戀此區區糞壤哉特如僕輩秦刳浮生無由復
發深省于晨鐘暮鼓間則亦慈航尊宿所尚宜援
手者耳炎盡涼深當以一葉舟相與話石泉槐火
舊夢也

與畢西臨

弟來燕市一入鎖闥再塵薦牘妄冀稍伸矚目而
平生布衣昆弟袞袞悉登詞館維此勞人依然樵
悴仍以如葉之身寄食硯田想知戚亦爲於邑也
幸在慕公子寓齋主有虛左之恭客無彈鋏之歎
幾忘羈縲爲困然故園親舊渺焉雨絕回憶數載

前小樓聯榻孤燈夜話時譬如索響前林追夢夙
世每一念至曷勝惘惘孫商聲海棠緣借題寫照
悲艷紛集弟已爲作序在商老緘中乞索正之

寄潘次耕

憶自河梁分手尚扇春風值此旅館驚心忽逢秋
月流光如駛而僕僕羈縲間可慨已方虎以異才
宿望爲玉堂客然其氣彌下其情彌摯昨者奉札
定交凡可置力者極意挽推非我端人之友其能
敦古如是耶都門諸先達久懸買賦金佇望凌雲
之筆未知攬轡卜于何日弟雖寄跡京華每想黃

門御輿之樂則精神夢寐無日不在故園第恐策
蹇南旋而文旆又將北指奈何

寄徐立齋夫子

琇以謗質旅踪奉侍左右側聞訓誨自謂一介之
命千載之知得有所托而老夫子提衡絕學領振
末風敦雅抑囂崇真屏僞于以勵節概樹名義厚
故知獎後進有行古人之所難行者琇竊丐餘光
輒思稍自砥立尊行聞知以無負所向往則旦夕
陶染或可需久以成詎意老夫子忽罹大故慘焉
星馳門牆之士惘惘若失所天琇之悲結又何言

矣琇家本單落惟不能俯仰枉合妄冀竇進壯齡
孤賤乃分之宜特以高堂千里菽水不贍用念獲
沾微祿上慰雙白而齒牙餘論必藉高軒感恩知
已卽古賢哲未嘗不眷眷于此惟老夫子始終培
育之琇亦從此可廣行飭業以抒素志而副厚望
至若操雕蟲之簡逐戰角之塵挾鷄籬以自高抱
麤肝以爲寶庸庸取福錚錚附聲當非老夫子之
所望于琇而琇亦不敢以此自處也高門生詠習
次磊砢才氣卓犖而好奇自負往往少與寡合長
安知己惟老夫子一人忽離所倚潦倒益甚湯西

崖右曾周翼少稷清才弱歲正待磨礪俱以不得
共侍几席終晨快悒次耕兄夙荷垂注今又爲之
下榻忘分之雅同侶切心數子非獨才華優瞻而
品格端純乃俱貧賤落魄同于門琇故因及之

寄沈竹西

三秋將逝薄寒中人每念綈袍之贈衣被盛心豈
有涯涘弟以經營菽水勉就硯席而雙白老親無
時不在胃臆乃仁人之粟時以見頒俾甘旨無缺
而荆婦井臼之困亦以稍紓揆之此誼其在今人
已棄如土而吾兄每加靡倦能不令天涯遊子感

之次骨也尊駕常在武水署中否老伯近社想益
勝聞有宵小爲祟以大度處之如雲點太虛何足
介意但自南來者微言老伯下車之始于莫公舊
績頗欲改絃竊以爲非宜昔曹參治齊其于鄼侯
故事一無變更而寧一之頌史猶稱之苟其便民
自當率由前業吾兄以爲何如

與家易庵夫子

老父至署得悉近履萬福甚慰遠懷但天上石麟
未占晚歲溪邊桑畝漸減曩年憂從中來卽達觀
者不無介介然蘭薰雪白大渾所忌庸庸之福不

擇而施此間寧能置人思議居易俟命獨推君子
伏惟老夫子屏脫徽纆觀空自怡酒尊碁枰惟意
之適不反覺封萬戶者之易危而慶百男者之多
累哉琇所治僻陋兼以竭澤之餘民多菜色爲之
除苛振廢頗與束髮受書來先民是則之志不甚
刺謬滔滔盜泉雖渴不飲四知自矢古人以爲絕
調自琇觀之不以所知問之昭昭難昧之良而遠
求之天地猶隔一層耳荒署蕭然僅以近刻二紙
奉覽知其簿牒餘閒不廢吟咏廉非難爲而俗猶
可療千里外當爲莞爾矣

答簡謙居夫子

琇本江左單微幼歲常知讀書好古而帖括未工
逢時特拙自分槁項桑樞絕意雲路老夫子拔之
菰蘆之中置之琳琅之列振汚噓朽德倍幬持豈
期十載長安兩別京兆飄然蓬跡饑走緇塵庭闈
雙白負米無計因於庚申之夏勉就銓例卽以是
秋承乏中土再稔以來學校農桑漸次興復而茹
蘗飲冰素心自矢晝侍慈幬宵依衾影無悔無疚
所謂尊聞行知可越關河而告之函丈也老夫子
邵德偉猷舉世鮮匹雖鬱居荒瘴而荔波龍洞經

緯嘯歌何所不可黃門生滯苦心積學亦以食貧
屢躋有喜獵之舉近閱邸報選授宜山聞其地荒
民散撫輯維艱然幸托蔭餘常得進丹砂爲壽又
奚啻樂郊之適乎

與姜西溟

午日晤武林馮長民詢知行臺仍在平津東閣兼
以珥筆史館馳驟班揚生平抑塞磊落之氣于此
稍吐矣弟以兩親垂白計窮負米下心俯首竊祿
中州晨夕晤對惟椎髻鶉衣視長安故人高步鳳
池者若霄谿之不可合先生爲一生知己能不以

臨野堂集 卷一
昔年窮途之淚灑及僻壤下吏也貴鄉王夫子爲
先生致書柏臺并及菲質柯亭之感雖在爨下灰
心忤然而動昨秋曾已緘謝不意忽傳凶問驚慟
彌旬大梁多古賢遺跡先生倘一過訪便覽荒署
則猶能躬掃槐陰以受玉趾之履

答劉元歎

忝來示以指意乘鳳吹簫此何等佳事屬在同好
敢不具十斛黛螺爲京兆畫眉計然以問之范萊
蕪則固未能手掇釜中魚代爲扞擋也至於短轅
犢車長柄塵尾當是年兄家有之物又無俟故人

遠致矣

與周廣庵

自叅軍應聘折柳歌駒忽焉經歲曷勝眷繫弟子
去歲策蹇彈丸僻在荒陋無由得通鯉素逮茲黍
谷生春十里杏紅將復笑迎文旆雲間鳳毛轉瞬
遂干霄直上當曲江啖綾餅時亦念梁園尚有爲
五斗折腰者耶司空經理端賴英猷底績平成自
可計日而待屬庇幃陰竊所慶慰若夫協理王事
寧敢告勞惟是蕞爾凋殘不得不爲國惜民故胥
溺之懼固殷而衆感之陳難抑因于河憲戟門有

所控告倘借籌前筋假之警欵則哀我憚人永佩
明德不在瓠子之宮而在蓮花之幕矣

答張弘遠

昨春承賜便面副以瑤篇逸韻動襟鏗音入耳簿
書碌碌楮墨久謝尚欲滌此煩囂仰酬大雅也秋
闈文戰佇聽泥金不謂臃腫先登良材屈抑糠粃
前列精粲淹沉能無爲驚才一扼腕耶雲奏舍弟
至得悉比來動定懸知照夜流虹光芒溢座握珠
吐鳳著作等身把玩良書有逾雅覲弟蓬轉天涯
委頓下吏一隅彈大滿目蕭然而素心猶存未甘

自棄內揆方寸常在冰壺上奉雙親依然菽水暇
則分經設席課弟訓子家庭天樂稍稍自慰至于
冥搜博討飛藻敷華登枚馬之騷壇搖燕許之鴻
筆端在畏友豈局促轅下者尚能復唱渭城哉近
日拙刻附政署牒餘閒仍有此技癢見之想當一
笑

與潘稼堂

門前桃李半植瀛洲大雅小山聯翩接武藝林勝
事海內驚羨惟是天涯下吏自歎淵沉且罹大故
艱難愁苦莫由繪陳昨歲役還蒙手書遠唁握泣

披展草土承輝琇匏繫黑子二載有餘向時長安
交素未能以橐中裝分貽競獻爭相詬厲自知廉
不可爲難免于世但夙聞三益之教兼守先子明
訓飲冰茹藿甘于釜飴蕭然荒署四壁徒存未知
有橐何裝可言乃責其不以阿堵物取此遺彼亦
已過矣夫取盡錙銖用如泥沙非有羽虎飛噬之
威必有狗盜穴土之智此種伎倆寧忍爲此非惟
不忍抑且不暇琇之在官招徠流亡則出粟買犢
考較士子則捐俸行庖釋二十年久滯之冤獄興
三百載久圯之學宮兩生已禡之衿顛學使而得

復四野爲厲之鬼禱隍神而盡驅其他平徭緩賦
息訟清刑不憚心疲體瘁髮蒼視茫而此焉汲汲
又何能經營苞苴乞憐于麟臺鳳閣間乎去冬履
凶之次通邑士民走請上臺欲畱交代琇以此舉
大是悖戾峻拒不能幸中丞深恤哀隱獲全吏節
今已扶柩移駐河干出郭之日白衣冠而送者填
闔塞路婦女兒童無不雪涕得民微驗畧見于斯
所痛蕭條旅櫬磬磬八口歸則輿楫無資住則饔
飧不繼惟藉二三父老不諠夙惠爭以菽粟相餉
聊糊朝夕然此土豈可久安因遣豚子奉叩崇階

并謁兩徐夫子俯憫在疚共相拯拔早歸故里不
第舉家啣肉骨之感卽先子遊于九原亦銘刻于
仁人君子之能庇其遺孤也

又

寅旭先生溘焉長逝天人之學竟失其傳并無一
綫之孤以供椒馨造物之報施乃爾先生念及其
後不勝酸顏篋中遺書俟卜歸有日卽當廣爲搜
羅以垂不朽然非賴巨手表章則蠹簡塵編蜚聲
未遠恐後人遂無有浣薇披吟者矣

與沈丘署事楊丞

趙氏家口原屬沈案拔而生之無關功令今聞郭
公將入境大力轉移全仗洪慈若再拘成例入而
復出之法旣近於鼠首事亦同于蛇足仁人君子
何不爲福先而猶做之是踵乎細侯倘有意外之
虞則徐寅翁縱放之詳固在凡有殃咎弟以身當
之

與閻公融

霖潦甚狂六旬乃得見日正老杜所云一秋常苦
雨今日始無雲也未沉井塌愁聲盈耳彼蒼者天
不惜汴民百萬爲魚偏于今日麗以靈烏懸以皓

魄若不欲負此中秋者令節之係重九霄如是耶
草堂淒寂無以寫憂做少陵爲秋雨歎三章泥濘
稍解可同令兄躡屐過看

與王鶴洲

雨塞柴扉棘人愁病瀟瀟孤館惟有把玩大篇一
以益枵一以破寂擊節之餘不禁泚墨汚銀屏而
加點規竹杖而施斤何足當大方一映耶望後得
齊始知人間尚有秋色幸托素心無煩折柬興到
自當策蹇卽晶飯可以一飽

上林澹亭學憲

今茲夏五騶從儼臨較及卑邑雕嘘非淺含經之
士宿素咸登伏牖之童單寒畢達曩者琇所甄收
隱相符合以是苦土餘生願切攀稽匍匐懷刺求
慰仰止所悵懸絕嚴凝未遑塵拜然從蕭知州處
遙荷憫諏更垂恤資司業之尊屢倒薦福之碑未
轟意非出於妄干惠實踰于當厄遂令雙袖淒飈
揚仁再燠七辰虛甌負米重燃苟其含識寧忘鏤
臆也琇出都時敝夫子徐立齋先生問治項何先
琇以愛民敬士對先生執手曰勉此四字循良可
期再稔以來矢之弗告履凶解組薄有記染琇念

十載之賦帝京未以吹竽售技千里而求祿養翻
成銜索興悲斬然在疚焉用文之而學錦未工邑
人收其拙製向隅獨泣座客錄其愁言未欲遽違
衆志因以所輯奉致文軒昔三都鉅筆非求弁皇
甫則紙貴靡從矧一字微吟不待矻昌黎將覆瓿
立致用祈神斤斲汚袞章飾陋倘蒙吐鳳冠此雕
蟲詎止不燃之灰貸光日谷已敝之帚薦掃雲門
已哉

上徐立齋夫子

老夫子遠頒慰諭意將起顛木而蘖之詎謂斷梗

方漂哀莪再廢鮮民之痛不如無生祇以輿蓋隆
恩莫酬萬一許身有日寄喘萍蓬想聞之函丈必
且憫其命之窮而歎不材之難以終篤也適閱邸
抄銓議有左除獨坐語似是之間憤訝隕迫大約
敕棒之議嚴則塗樓之忌集鳴岡之風肅則止棘
之玷生宦海茫茫屈伸何定然杜陵朱絲之詠看
山烏府之篇以今方昔千載爲昭况遇盛朝終當
容直蒼生前席遠不俟瞬耳擬卽馳候而賁糧策
衛窘于戒途踟躕經旬望風黯結

又

今夏炎威土中尤盛青門塵勞所集蘊隆想亦不
減伏惟老夫子履綏萬福爲慰昨詢陳州教諭始
知老夫子已奉特恩不勝雀躍竊惟難進易退大
臣之常在夫子曾不憚薊然燭調塔平衆正彙進
此正其時轉圜錫箸自應迪簡聖明琇非鳴一已
之私實上慶朝廷而下爲蒼生賀也琇兩遭艱變
入口無依淒寄河干故園目斷旣非少陵入蜀之
舟十金可辦又無子敬卹周之粟百斛相貽尚未
刻期旋復言之可勝於邑稼堂被論未知部議若
何稼堂瑋逸之才與遺山磊落之品相伯仲其薦

也誼不忍出以老親故出也如得蒙恩放歸亦所
以成其志耳琇在京華惟高潘知契最深故因及
之

答項邑諸公

弟以貧拙書生計在祿養學製美錦濫膺貴地百
里之寄已負三載之報未成政依僑惠或來濟乘
之譏心比陽勞翻致逋租之累兼以命之不猶蓼
莪再廢旅人薄宦自問慙焉其居也無足言其去
也何足念哉峴山片石雖羊叔子之賢不無慮及
後世名然以此方彼奚啻徑庭而諸年見乃爲之

匪以爲頌不益滋之矣乎辭簪而後與足下昕夕
晤對投分之密有逾骨肉講德論藝抹月批風已
足稱千秋佳話又焉用壘曰文之也碑語褒有溢
辭捧之增愧容令豚子趨謝

寄閔繼協公融

別後萬愁畢集一貧難遣債主雁立于門饑兒蟲
啼于室初意千里謀歸定有佳况豈謂故園異土
其困無兩古云廉不可爲誠以廉之可恥可畏乃
爾也所幸者天能斬我以米鹽不能撓我以筆墨
二冬文史足代七日絃歌在陳去陳惟恃此訣劉

昆陸弟名擅千秋惟同氣並才故有二難之目黃
槐紅杏無歲不有苟非其人曰忝曰竊唯君家芥
拾之爲無愧亦蟬聯之可預決耳王爾固績學傾
人介性絕俗求之吾吳不可易得居無書出無車
又未嘗不念其古道彌厚也附有近作舉示二公
知我近致爾爾

上徐健庵夫子

邸報來秦獲觀南宮虎榜自設科以來得人之盛
恐未有此蓋值天下化成之候加以老夫子知鑑
之神適相際合乃曠世而一覩也尤可喜者琇于

今春上元有燕市相逢行一詩贈弘遽西崖聲山
三子稱其風流淹雅無愧科名不意並題雁塔而
名姓前後亦與里言次敘吻合參籠珊網寧有遺
憾耶玉筍班聯望旣崇于韓氏柏臺晉秩德復種
于蘇公自此野無遺賢獄無寃民引領稱慶當不
獨關中下吏而已但琇前歲令項時曾署沈丘邑
篆其獄中竟有男婦六人囚繫十七年而未釋者
琇至沈三日毅然出之羣有再生之樂聞開封府
屬邑尚有沈獄如沈丘者不一而足推之海內抑
復可知老夫子咨查直省以一言入告盡釋九有

寃滯則仁利之溥所疇如天琇從晉入秦二千餘
里多半山行水之大者爲汾爲洛其流與河偕黃
唯漆水繞粟邑而出者色獨白白水所由名也一
城斗大圍以荒山署舍壁宮規制頗廠但俗刁健
訟懲其猾者數人漸得衰止邑無所產唯水可酌
攜得老夫子所貸金猶餘二三笏日買蔬數莖與
朝來西爽同餐耳

又

風薰便羽僅械寸忱匏繫荒疆乍逢判歲白雲如
夢蒼髯將絲竟虛捧檄之懷尚黍抱關之秩甚則

杞厨告匱幕友爭歸郵月獨看室擊未至冰居孤
署有同禪寂回憶去年茲候常荷鈞呼時依雲閣
授簡清宵燈分螭首侍尊良讌炙賜牛心每聆嘯
朽之音輒負鏤肌之感更籥以還銜恩莫極不謂
天西末吏正爾神馳老夫子引退之章忽從郵見
恚愕交生不禁繁涕雖信結九重曾無移于謗篋
剛踰百鍊亦何玷於信聲而人望未厭廷平罔據
環海蒼生寧能久待其夙夜延跂豈止龍門之一
鮒驥路之一蠅已哉三老夫子繼陟梧岡再持柏
憲金玉接武中外伸眷他日元公曳舄野起周禾

司馬凭與人登洛樹卽老夫子左券矣關嶺迢遞
經時闕候琇之支離拓落揆之今日宦途拙無其
偶然竊惟老夫子定能鑒之至于訓承琢玉性鄙
攫金冰蘖爲餐衾影自勵此固可遙詢而得者尤
望晞以末光加之曲蔭倘邀甄拔敢負鈞陶

上徐立齋夫子

去年馳稟而後老夫子再登柏府繼掌庾臺不第
門牆下吏鳧躍無隄而九重求舊之方於此而正
四海作新之氣于此而深喁喁蒼生將見歡迎司
馬凡凡赤舄定知禮遜元公若丙魏之祇求故典

姚宋之未靖羣小俱不足爲老夫子言矣白邑瘠
土難以驟裕獷俗難以漸馴早作夜思日慎一日
伏念辛酉之歲老夫子手諭曰凡爲民父母無論
更絃而理仍貫爲治要有與百姓痛痒相關之意
奉斯大訓銘座書紳服之數稔未敢刻置至於善
事上官曲承豪室往往遜能今吏恐非自全之術
耳

答金道州

初謂貴治荒狹不足以展長才不意掣肘如此然
竊念世間仕路真同塞馬自以爲得安必無失自

以爲禍安知非福况天下事當無可奈何之時一
味堅忍擔當勢將漸定譬風動凌雲樓狀欲飄墮
徐起而正之乃安一加棖觸卽危矣嘉惠遠至悉
已拜登以貪自與而成人之廉得無嗔其尚有曩
心乎小詞奉酬并附物以豫貯寵姬撫白之具見
之定當一笑弟腹非無黃連水也特黃連樹下吹
簫者耳茹苦述諧不盡縷縷

答王爾固

菊秀河干匆匆執別於其行也盛侔佳惠相屬于
道雖寄身燕市久閱三時此心何刻不念我良友

也令弟爾謙來遠賜佳什併翰督以所不逮敬已
書紳敢忘明訓但公私義利此卽君子小人所由
分一徇請托則必庇曲棄直從邪毀正剝窮民之
脂膏媚貴客之面目此何等不肖事而謂昔年強
項者今忽繞指哉荒城寂歷與貴鄉風土不甚懸
殊惟黃山四圍白水一帶其清可酌其秀可餐聊
足娛我晨夕兼欲公之知己白卽古彭衙地杜少
陵於天寶至德間曾再過其處今少府高齋雖莫
可問而故人猶可爲風月主能無藉高人之至以
續勝遊耶秋風良晤跂予望之

與吳程二子

燕市塵紅人羣如螻而知已寥寥無可披握非遇
高荆不幾辜我晨夕哉判袂青陽忽焉朱夏每憶
旗亭放飲燈合清吟回首天西形睽神合山川重
阻豈能間之邗月簫聲久懸江畔兩兄于何日得
抵維揚耶登堂之拜割宅之居此固人間僅事管
鮑范張其數皆兩今復見程吳嗣千秋矣白邑地
微政簡足安疎拙古槐蔭署如蒙碧幄風晝露晨
禽音滿耳中有高樓百尺可咏可卧差強人意唯
彭澤之五斗未至萊蕪之一甌已虛山光入戶青

不可餐不能不置想魯公指困耳

寄徐月山

水晶宮風流未墜以兄臺玉映其間載酒清茗尋
詩蒼弁勝懷韻事遂冠西吳所惜狂言驚座者羈
跡隴干不得浮扁舟而來一觀使君水嬉則綠樹
紅芳共相惆悵矣

與李蒼山

從郵筒中接讀手翰知貴治地甚蕭寂但聞之於
古利器必逢錯節潔士不入羶鄉彼蒼者天其肯
以我輩漫投之金穴哉酌泉烹杞無玷素絲以徐

俟雉馴于野虎渡于河而已民而貧維官之咎官
而貧實民之福也我貧亦甚因成賀貧詩四韻書
奉公餘一笑

又

秋亭午粥正爾馳想忽捧蘭書喜爲輟箸俾來詢
知琴堂清暇徵歌命射興復不淺遙見元龍豪氣
猶在也敝治山城僻陋一無所產市米常爭國陶
亦寡所諭諸物購之閱日乃備土風魯衛可謂無
慚兄弟言之能無一喟噓耶流民王薦蒙恩檄還
至家月餘忽焉物故其妻真斃夫能手矣鮭菜二

種附納便郵幸嗣音爲禱

與戴康侯

秋祀典行邑諸生之有事廟壇者儀文猶未盡失而籩豆簠鉶缺焉不備舊例悉克以磁灌獻之餘隕越是懼比聞學宮剞製禮器燦然合則真無愧乎容臺而出牧者矣乞以諸器式寄示敬當遵教爲之以成千秋盛事鹽菜三種附役馳用古人謂士大夫不可不知此味故敢置之左右兼以奉勗勿以野芹見哂也

與湯禮耕表兄

弟再行捧檄而養不逮存雖強膺簪紱念之身有加痛母姨大人視我如子惟遙祝高齡善飯恍碧護之在望耳曩者憂居時表兄常戲謂今人出仕有三要務一曰晉秩二曰肥家三曰裕後汝何計不及此弟宰白已經半載終不得其肯綮然必欲勉副厚望大約居官不愛錢則有升榮之期處家不生事則有安飽之慶子弟不倚恃父兄而各能努力讀書則有騰達之效舍此更無別法未識尊指以爲然否幸無覽之忽噴飯滿案也

復李蒼山

昨遣小男鶴升叩祝過垂芝暎兼賜郇筵醉以紅
妝之酒贈以黃絹之文孺子何知恭逢嘉會歸述
斐情卽老饕不禁色動矣傳奇十闕俱出自奴輩
口授音字多訛恐玉帳梨園承而習之不無費周
卽數顧也然開卷卽見藥師渡江一事足令仙李
解顏

寄祖明府曜南

鶴裝久蒞敝邑早應馳賀而千里關河未能卽達
然新猷雷布休問颺飛親舊來自故鄉者慈母神
君之譽不輟于耳依雲仰止林慶何如敝邑賦繁

事劇民亦淳澆相半噢咻與擊斷並行自能游刃
而治承詢芻蕘具陳前札竊有進者莫如假命一
事梃刃斃人其情原可立見餘則假以構釁騙財
者耳薦紳因以把持訟師爲之游說詞甫到案兩
造之家已破至於牽累圩鄰尤可憫惻或謀或鬪
意起倉卒旁觀豈能得其要領卽其事果真于鄰
實屬風馬况真命固百不得一乎痛懲誣告而立
與結局則小民受賜無涯矣

與朱守府

坐對墨池驚翻紅掌行巡茶竈喜鬪綠頭不謂陸

海之陬獲逢禽戲忽如彭衙之役重亂軍聲荒署
俄覺春生遠客益濃鄉思矣

與金道州

山椒春始忽接鴻音十年惘惘之意遂于珠玉行
間恍成良覲其爲怵快不啻渴客邁泉貧子抱璧
自以榮旌西邁定出彭衙不謂鶴裝竟指幽原眼
穿落日我勞如何曩者燕市尋遊匪伊朝夕微雪
旗亭穠花簾幙有時狂或擊尊詐曾唾視卽李杜
鑪頭高荆筑畔亦何多讓豈期共嘗海苦各履風
悲荏苒朱顏乍成斑髻毛櫛之感諒有同懷魯戈

之揮尚能復覲耶竊所幸者地鄰清渭旣諧飲綠
之操願慰丹砂更獲近朱之侶鸞林在望無待披
顏鯉錦常傳便同握手若云三里山城邑爲最下
委諸蹇命良不謂然蓋淵明酒巾未聞漉向銅山
康樂詩屐寧必躡從金谷做邑形如粟大正堪伯
仲以彼方此其可釋前愆而軒渠矣

寄錢宗岐

粟邑形大于粟而聖育史皇賢祠杜甫頗著往蹟
但其僻在山陲有客至潼關而問途白水則懵然
莫對者大約涇原駟僮之都豪士摩肩爭入鉅公

側耳願聞若夫菊艷陶籬塵清范甌則羣相鄙夷
誰復念之蕭凄荒署雀語盈簷忽蒙令兄先生嘉
惠遠來片言記及空谷跽音云何不喜也長日如
年苦無異書可購良友見過遣此寥閭舉是二恨
以告故人當益歎丁香小院話雨西牕人間好境
固未易得千里申臆曷勝惘然

與徐章仲

尚友千秋壯遊萬里古賢謂此爲人間二大快事
老世兄入集蘭臺出銜鳳詔以高密封侯之歲驅
相如建節之鄉蒼山一點收貯奚囊朱紱兩行拜

迎洱海豈乘槎之檄客投筆之書備可並日語哉
與姜西溟

去年僕僕塵海幸獲時叩停舟聆高論之激揚觀
華牋之揮染輒覺耳汚目翳豁然清醒入秦而後
坐想此樂往往神移惟把玩墨妙恍登芸館卽空
山修晷差足自遣也敝治僻在屢屨城亦斗似其
所謂博士弟子與二三孝廉率皆以耕兼讀袖出
兩手黑過于漆呶唔一卷舍爛時文外不知緗帙
爲何物有心口而無書可借有風月而無友可談
秋水伊人徒虛語耳小摘一芹以佐先生尊酒或

可緩典鷓鴣三日

臨野堂尺牘卷一終

